

nn

2 /

BIBLIOTHEEK KITLV



0214 4184

169 302 407

SJA'É MEULAJOE

POETROË NAGA

NGON TEUNGKOE DI LHŌ' TAPA' TOEAN

KARANGAN

M. SOETAN SINGA SORO

GEUTEUDJOEMAH NGON GEUKARANG LÉ

L. B. TEUNGKOE MOEHAMAD NOERDIN

GEUPEUGÈT KEU HIKAJAT BASA ATJÈH



nn
21
Serie No. 1023

SJA'É MEULAJOE

POETROË NAGA

NGON TEUNGKOE DI LHÖ' TAPA' TOEAN

KARANGAN

M. SOETAN SINGA SORO

GEUTEUDJOEMAH NGON GEUKARANG LÉ

L. B. TEUNGKOE MOEHAMAD NOERDIN

GEUPEUGËT KEU HIKAJAT BASA ATJÈH



BALÈ POESTAKA — 1932 — PEUTAWI

*Hikajat njoë hana djeuet djitjab atawa dji-
salén teudjoemah lé baranggasoë malingkan
lé njang po ha' keudroë. (Stsbl. 1912 No. 600)*

Ngon béseumilah lôn poephôn njoë,
Toehan sidroë that koeasa.
Neupeudjeuet langèt lom ngon boemoë,
ngon doem asoë le wareuna.
Neupeunjata doempeue bagoë,
dilèe doedoë neupeuroepa.
La'ôt darat that seureuloë,
glé sinaroë goenong raja.
Ladôm manjang meujoeb ngon tjoet,
Toehan ma'aboet atō doemna.
Njoë lôn kisah Teungkoe Toean,
koeboeneu tan tapa'neu na.
Geupeulheueh ka'ōj niba' tapa',
masa neudja' neutob naga.
Naga pi maté goenong pi beukah,
srôt koepiah lam la'ôt raja.
Haba njoë oelôn peunalam,
lôn toeeng pham ba' Sja'é Naga.
Karangan Soetan Singa Soro,
lôn poebako na djroh haba.
Di Tapa' Toean boet meuteuntèe,
koepala goerèe gobjan raja.
Ba' sja'é gobjan lôn toeeng teuradjèe,
oebè 'èleumèe geuparé'sa.

Na tjit ladōm njang lōn tamah,
 mangat indah gob ngo haba.
 'Adjajéb sōbeuhanalah,
 bah lōn peugah oebé haba.
 Singa Soro geukarang njan,
 haloean Balè Pōihtaka.
 Keu gantoë ranoeb lam poean,
 bri keu énsan bandoem rata.
 Geukarang sja'é djeuet keu peusaka,
 keu oereueng doemna tinggaj doedoë.
 Geuharab ba' geutoceng di Balè Pōihtaka,
 djeuet gob geuma oeroë doedoë.
 Amaba'adoe doedoë niba' njan,
 saboh koerangan lom lōn rika.
 Haba that djameun phōn disinan,
 han soë toedjan awaj masa.
 Haba gob peugah meutindan-tindan,
 hana saban ba' tjalitra.
 Ladōm meunoë la'én kheun meunan,
 oereueng peugah ban batjoet bida.
 Le tjit njang kheun kon meunan proë,
 djeuet kamoë sang mabō' gandja.
 'Adjab that haba djipatroë,
 haba poetroë Teungkoe naga.
 Teupiké ba' kamoë djeunoë,
 lōn karang njoë gantoë seunda.

Dalidji le doem meutaloë,
 neumoeprang teungkoe droë neupoh naga.
 Bandoem tanda dja' eu keudroë,
 bè' sang kamoë njan preuboela.
 Djeuet djikalon lé barang soë,
 prang meugoemoë naga raja.
 'Adjajéb keubit doem haba njoë,
 koeasa that droë Toehan Asa.
 Neupeulakoe ba' kheunda' droë,
 ateuh geutanjoë ban sineuna.
 Ta'eu ngon mata lé geutanjoë,
 oebé ban proë njan takarang.
 Djakalèe tan habéh eu keudroë,
 ban gob poeproë meunan karang.
 Ba' masa dilèe djameun poeroë,
 ban haba njoë tan soë reuntang.
 Geuthèe lé gob doem sinaroë,
 haba poetroë teungkoe moeprang.
 Ngon naga raja nan Goentala,
 sabab nahoeda tjo' Poetroë Trang.
 Njankeu poetroë aneu' naga,
 di koeala ba ploeeng reudjang.
 Haba njoë bandoem meuleu'a,
 aneu' ngon ma djipeudéndang.
 Narit djikheun poemeulia,
 kon tjeureutja djipoewajang.

Geukheun lé gob njang peuhaba,
 jōh goh geuthèe nā Tapa' Toean.
 Mantong oeteuen rimba raja,
 oeleue naga djidoeë' sinan.
 Barat Atjèh teumpat meuhat,
 doem latbatat lam rimba njan.
 Jōh goh sinan djeuet keu nanggroë,
 oeteuen sinaroë teubaj han ban.
 Binatang oeteuen le moebagoë,
 doem moepeudoë djitoeë' sinan.
 Lom le that djén moeplōh bagoë,
 'oh malam njoë soe djiwan-wan.
 Tan na sidroë djidjeuet peutoë,
 ba' that ba' oeroë takōt keunan.
 Ba' that lé oereueng njang peungeuroë,
 bie' geutoesoë beuhe ngon kha.
 Meung njo keunan han djipeutoë,
 takōt moepaloë le that bahja.
 Bala disinan bit seureuloë,
 badeue' moepeudoë rimoeeng raja.
 Oeleue le that han é' poeproë,
 la'én doem njoë limpeuen kala.
 Teungkoe Tapa' Toean nan keuramat,
 Tō' 'an kiamat that meulia.
 Bandoem oereueng peulheueh hadjat,
 peue djikasat ka'ōj nada.

Ba' oereueng sinan ka meu'adat,
 ngon nan teumpat lakab nama.
 Sabab Teungkoe sinan teutab,
 jōh neupagab naga raja.
 Teungkoe di Lhō' djimeuhej nan,
 keuramat han ban silagoëna.
 Ban silingka glé meureumpan,
 poetja' lam awan manjang raja.
 Di keue goenong njan la'ōt bahrōlah,
 doem ho leumah pandang mata.
 Ateueh manjang doempeue leumah,
 kapaj meurimbaih djan djiboengka.
 Oereueng Barat djimoepantōn,
 dji'ajōn aneu' djidōda.
 Wa'tèe djikheun meu'alōn-alōn,
 djipoephōn ban lagèe Rawa.
 „Tapa' Toeān lam lingkōng goenong,
 peurahō tamong poetōih han reuda.
 Tagaséh keu lōn haj oereueng inong,
 gata that tjarong 'oh lōn eu roepa.
 Ban peuneugah cereueng doe' toë,
 asaj nanggroë geupeuhaba.
 Djeunoë keu Teungkoe haba meuriwang,
 raja ngon panjang tan soë hinga.
 Oereueng djameun badan seudang,
 peunanjang sireutōih deupa.

Njang keubanja'kan oereueng seudang,
 leubèh lom manjang oereueng toeha.
 Oereueng djeunoë meung njo djipandang,
 salèh njeum sang maté pahna.
 Ba' masa njoë djareueng na meunan,
 malingkan Gogasi Raja.
 Sidroë Inong di Glé Boeahan,
 raja han ban silagoëna.
 Roepadji djroh that tan seunabé,
 meuteumèe bangké tréb gohlom na.
 Meuroempo' ngon oereueng lét lé kaphé,
 Sinan meugoelé mantjètdji na.
 Djih njan maté sinan reubah,
 teunoembō' gadjah poebinasa.
 Oereueng theun gadjah djibōh peutaih,
 tadjam leupaih tintjoe mata.
 Hana djeurat koeboe toean,
 euntjit sinan tapa'neu na.
 Teungkoe Noerōtdin njoë peugah ban,
 tapa'geu njan lom la'én na.
 Neuraja Teungkoe han soë toeban,
 malingkan Toehan thèe oebé na.
 Di geutanjoë dali tapa' njan,
 ngon teureuban kajèe raja.
 Goenong Intém-intém saboh tapa',
 panjang meuhala' siplōh deupa.

Di ateueh batèe jōh ban neudja',
 ateueh poetja' ba' glé raja.
 Keunan le that oereueng meu'ara',
 bandoem djidja' peulheueh nada.
 Peulheueh ka'ōj doem meureula',
 keunan le dja' Gajo doemna.
 Djeu'ōh ngon toë djitrōn leugat,
 tapa' bakat that meulia.
 Toepè oeteuen le di sinan,
 rajadji ban rab oebé pha.
 Doe' djikeumiet ba' tapa' njan,
 sabé meunan djiwèh hana.
 Roepadji djroh that poetéh itam,
 le matjam ta'eu wareuna.
 Ladōm poetéh na njang hilaam,
 boelèe itam mirah pi na.
 Seu'iet raja doem toepè njan,
 djibri makanan lé soë teuka.
 Hana djeuet tatjo' binatang sinan,
 han moeban-ban teuka bala.
 Trōih lé rimoeeng njan ngon tjagèe,
 djisoekrèe maté binasa.
 Meung han tapeulheueh djih takarèe,
 han tateumèe woë oe tangga.
 Oereueng Gajo keunan ili,
 Mè rapa'i ngon gōng raja.

Tambō geundrang dhab napiri,
 djimeudōdi ratéb mènsa.
 Meunan 'adat reusam dilèe,
 djitirèe ban Hadih Madja.
 Ba' teumpat njan neutjo' toengkat,
 kajèe raja that ba' glé raja.
 Siba' kajèe glé njang raja that,
 neubōt keu toengkat ngon poh naga.
 Djeuet keu tasé' euntjit neubōt,
 Misé la'ōt ka djeuet paja.
 Kajèe djeudjabi siba' neureunggōt,
 langkah neubōt timpeueng landja.
 Neulangkah oe Goenong Api,
 dja' ngon gaki oereueng teuga.
 Si'oeroë rō' moedé' ili,
 goenong Api tō' tasapra.
 Glé Apoej di Gajo Loeaih,
 djeuet lōn peugah dja' paré'sa.
 Mangat tangieng ban lōn kisah,
 bè' poebeu'aih dja' peunjata.
 Disinan Teungkoe neuloempat,
 tasipat lapan oeroë na.
 Keudéh neugrōb blah oe Barat,
 trōih ba' teumpat neupoh naga.
 Teuganeu that tan seunabé,
 goenong reulé doem meuleu'a.

Habéh teumakōt binatang glé,
 Sa'ti kon lé Teungkoe Tapa.
 Hékeumat sa'ti le boekon lé,
 tan simisé ngon oepama.
 Tan na meunan djeunoë lahé,
 ba' that sihé balé' mata.
 Jōh njan rimba goh lom soë tjah,
 Bahrōlah doem oeteuen raja.
 Oeteuen rimba djidoeë' gadjah,
 han peue peugah oeleue bisa.
 Ō'geu panjang teugeureubang,
 bé go parang njeum salèh na.
 Hana soë é' djeuet meung pandang,
 meuh at tjeukang maté pahna.
 Djanggōtneu poetéh na si'ōn-ōn,
 djeuet meu'ajōn tja gèe ngon kra.
 Rajaneu that Teungkoe Ampōn,
 leubèh ba' Milōn Djoegi Tapa.
 Mataneu mirah meu'é' meutrōn,
 sang teumambōn hoe meunjala.
 Meunan peuneugah jōh awaj phōn,
 leungo oelōn njang peuhaba.
 Gigoëneu raja leubèh ba' batji,
 soë njang eu gli poengo teuka.
 Sinan lé maté ban sibiti,
 oereueng sa'ti doem seureupa.

Loeaih dada pi lön kheun kri,
 soë njang eu gli até lia.
 Ada' tasipat tè' doea si,
 djeu'öh riti lhèe plöh deupa.
 Meunan geukheun lé njang toeban,
 na sinan Meunasah Raja.
 Teumpat khloeet poedjoë Toehan,
 oeroë malam sinan tapa.
 Meunasah njan loeaih han soë,
 timang peuet sagoë manjang raja.
 Leuboe meulib-lib awan tanggoë,
 neudoeë' sidroë ngonneu hana.
 Sinan toë ngon Loebō' Bajé',
 Rab ie taré' djeu'öh hana.
 Loeaih teumpat oeteuen neusé',
 Lampōih neubalé' oeteuen rimba.
 Disinan neupoela doem teunaman,
 djeunèh mamplam toepah pi na.
 Le sileupaih neubōh sinan,
 doem bidjian bie' peunoela.
 Neupoela djagōng gon ba' pawōh,
 le that neubōh bidjèh doemna.
 Hana sapeue njang tan neubōh,
 keu peunadjōh ma'noesia.
 Neupoela pisang tadjō' padé,
 djroh doem saré leuhoe raja.

Teubèe goelè han peue kheun lé,
 ba' tanoh glé neupoemoela.
 Djeuet djipèt lé baranggasoë,
 areuta didroë Teungkoe poela.
 Sinan Teungkoe neudoeë' sabé,
 neumeudiké poedjoë Asa.
 Njang la'én hana neupiké,
 até hadlé keu Rabbana.
 Doeë' teupakō baranggadjan,
 poedjoë Toehan hana reuda.
 Meunan sabé neudoeë' sinan,
 simeutaran goh lom pahna.
 Neupoedjoë Allah peudjeuet 'alam,
 njang neudeundam toewo hana.
 Neupandang dōnja oebé talam,
 Toehan 'A'alham keukaj baka.
 Le that Teungkoe lam 'ibadat,
 djeuet keuramat ban Èelia.
 Aneu' peuroemoh tan neuhadjat,
 droëneu ladat ngon Rabbana.
 Areuta beunda tan lé hiro,
 neu'ingat Po Toehan Asa.
 Peunoela lam lampōih bandoem baso,
 Pawōh Meureuno tinggaj tanda.
 Keu sinjata neudoeë' sinan,
 ba' Djeudjabi nan toengkat raja.

Bit raja that tan seunaban,
 neupoh ngon njan naga raja.
 Djih sipasang ban aneu' glé,
 tan simisé ngon oepama.
 Sinan djidoeë' dja'-dja' sabé,
 nan lhahé Naga Goentala.
 Teudoeë' si'at njang haba njoë,
 haba keu poetroë roepa tari.
 Aneu' naga tjeudaih han soë,
 roepa sangoë bidadari.
 Ma'noesia djroh sileupaih,
 roepa indah hana sakri.
 Dalam meuligoë meudjeureulah,
 ateueh loeah Goenong Lawi.
 Siblah oe timoe neudoeë' Teungkoe,
 han that djeu'õh ada' tadjá'.
 Ta'é' oe ateueh ba' meureutjoe,
 beungoh wa'tèe boe trõih oe poetja'.
 Njankeu Goenong Aloee Naga,
 barõh atana sinan Soewa'.
 Njankeu Aloee Naga Raja,
 djih doea kajém djidja'-dja'.
 Ateueh glé njan masa dilèe,
 djroh meulagèe hoe moebla'-bla'.
 Saboh meuligoë djroh meuteuntèe,
 doem boh kajèe le meugoendja'.

Meusiga' that hoe seumeulōh,
 leumah oe djeu'ōh doem gob pandang.
 Lam njan poetroë naga djibōh,
 dji'asōh dalam peutimang.
 Leungkab djibōh koeta paré',
 djroh lagoë é' djoenga patjang.
 Atana njan gèt that laré',
 doem meutjoelé' meuih geutoeang.
 Meuligoë njan Hékeumat Sa'ti,
 boeet Djén Pari njan ngon Mambang.
 Naga raja ajah Siti,
 Indra Pari trōn meureuntang.
 Sinan djipeudoe' poetroë malakat,
 hoe meukilat that trang bandrang.
 Soë njang kalon mata ladat,
 sinan lé meuhāt meutang'ilang.
 Leubèh ba' poetroë bie' Djén Pari,
 Baka'oeli aneu' Mambang.
 Hoe djeumeureulang Poetroë Siti,
 boeliadari sabé timang.
 Keu'ieng sidjakōb geunténg ban lhang,
 dada keumang djroh han sakri.
 Neudong linténg badan tjatjang,
 tè'dji timang ban boëdoeri.
 Barang soë eu doem teutjeungang,
 doem mabō'bang poengo keudroë.

Bandoem laloë 'oh djipandang,
 meutang'ilang habéh wahwoë.
 Gigoë meukilat ban beulian,
 tjahja roeman bintang paroë.
 Bibidji mirah meuseumaran,
 Kandjamara han é' djitheun droë.
 Boe'õ' panjang djan djigeureubang,
 itam han ban trôih oe gaki.
 Djibõh sanggõj gèt that timang,
 djitie' linggang sang keudidi.
 Beutéhdji ban boenténg padé,
 tiroet sabé ban geudjangka.
 Soë njang kalon hantjõ até,
 djitém maté han so' sangka.
 Han é' takisah sipeuet Poetroë,
 indah han soë khoeloe' roepa.
 Soë njang kalon habéh wahwoë,
 oereueng lakoë poengo doemna.
 Asaj poetroë tan soë toenè,
 keunan djimè njan lé naga.
 Njang keubit hana é' meunè,
 salèh panè tjo' djipoeba.
 Ladõm gob kkeun aneu' oeleue,
 tan soë toepeue asaj bangsa.
 Bandoem haba tan na moepeue,
 meugah meusiseue aneu' naga.

Naga njan raja tan seunabé,
 ban aneu' glé njang that raja.
 Djih ban doea sabé-sabé,
 tan simisé ngon tapeusa.
 Lakoë binoë sa'ti kon lé,
 djidoeë' lam glé kawaj djaga.
 Oelèe djitjeunggot sabé-sabé,
 dji'eu saré moesōh teuka.
 Djibōt oelèe manjang han ban,
 lam awan meutob koepala.
 Raja kon lé di naga njan,
 hibat han ban silagoëna.
 Salèh djén pari peuroepa droë,
 djitjo' poetroë aneu' radja.
 Di Ka'indreuen trōn oe boemoë,
 peuroepa droë oeleue naga.
 Poetroë Boedioe Keumala Sari,
 djōhari dalam atana.
 Peunadjōh makanan peukajan djibri,
 ajah oemi doem dja' mita.
 Keunan djipoewoë lam meuligoë,
 doem sinaroë njan djipeuna.
 Poetroë njan djikheun aneu' droë,
 gaséh han bagoë ngon tapeusa.
 Binatang njang djroh doem djipoewoë,
 keu ajeuem poetroë lam atana.

Tjitjém binatang doem sibagoë,
 djidjō' keu poetroë manjèn mata.
 'Oh ka malam lakoë binoë,
 di leuen meuligoë éh teuhanta.
 Sinan djikeumiet ban doea droë,
 kawaj bè' soë keunan teuka.
 Wa'tèe naga dja' mita eumpeuen,
 poetroë boeleuen tinggaj sidroë.
 Han sidroë ngon doee' lam mideuen,
 moë meureuen-reuen hana padoë.
 Tan na seunang peue djimakeuen,
 djitrôn oe leuen djidja' sidroë.
 Oe pasi dja'eu reuen mareuen,
 ngon peuleuheuen djitèh-tèh droë.
 Oe binèh la'ôt até soekeuen,
 meu'inseuen ba' Toehan sidroë.
 „Neubri lheueh lôn bè' lam oeteuen,
 bè' meudjoempheuen sabé sinoë.”
 Oe binèh pasi dja' eu kareueng,
 dja' mita kreueng meuneu'èn droë.
 Keudéh keunoë é' djitimpeueng,
 peue meuteumeung doem djipoewoë.
 'Oh taré' oeroë piōh sigra,
 doee' joeb bada peuseunang droë.
 Geupeunan Bidara Sa'ti,
 reuloej sari indah han soë.

Ba'dji rampa' òn moepajōng,
 rab Goenong Oedjōng that seureuloë.

La'òt raja goeloembang meukōng,
 Angèn lambōng djimeutasoë.

Hireuen tahe poetroë pajōng
 ingat keu oentōng ngon han sidroë.

„Lōn doe' di sinoë tan meu'oentōng,
 djeu'oh gampōng gob sinaroë.”

Ba' simalam njan teu'ingat,
 „Hana seubat lam meuligoë.

Ajah boenda naga hibat,
 lōn hadjat dja' la'én nanggroë.”

Jōh njan djidong niba' tingkab,
 djipeunab pat leumah dōnja.

Dji'eu koeala doem sileungkab,
 „É' keunoë rab ma'noesia.”

Njang leumah meung reujeue' la'òt,
 angèn bapōt that tjéntjala.

Dalam até kiblang-kablōt,
 ie soerōt soe meugeuloera.

Reujeue' bitjah ban keuloeloe,
 até rindoe poetroë moeda.

Bakat djibeudoih that meu'oe-'oe,
 na ban lakoe ratéb mènsa.

Dji'eu oe langèt bintang gèt hoe,
 makén leuboe 'oh djitakat.

Peunab ba' glé eu meureutjoe,
 doem dji'eu itam meukilat.
 Djipôt angèn that meudeuroe,
 meudjan timoe djitrôn leugat.
 Jōh njan Tjoetti até toence,
 „Pakri lakoe lōn si'oerat.”
 Dheuen kajēe meukajōh-kajōh,
 tjabeueng poetōih pataih soengkab.
 Sabab badè hana teudōh,
 mata lajōh djitōb tingkab.
 Angèn taré' makén that kheue,
 ō' meureue-reue poetroë naga.
 Keu koe ngon ma hana ingkeue,
 beuthat oeleue gaséh meusra.
 Djeuet teu'ingat keu oentōng droë,
 djeu'ōh nanggroë ma'noesia.
 „Hana mangat lōn doe' sinoë,
 maté sidroë trōih'an toeha.”
 Boeleuen rab djilōb ka meulé-lé,
 ie mata ilé prō'preue' djimoë.
 Pakrikeu han até reulé,
 doe' teubadé lam meuligoë.
 Sinan tan ngon tō' 'an maté,
 djikawaj sabé lé ma koe njoë.
 „Lōn njoë sidroë keunoë teubadé,
 djeu'ōh kon lé oereueng nanggroë.”

Oeroë malam meunan piké,
 djikeumeung meutjré ngon ma koe droë.
 „Ajah ngon ma lôn han djeuet marit,
 njan keubit soesah han bagoë.
 Han djeuet meuhaba koe ma lôn bit,
 toelōng keubit ja Rabbana.
 Peue djeuet lôn doee' lam meuligoë,
 hana sidroë oereueng teuka.
 Ma ngon ajah kawaj kamoë,
 Hingga keunoë mawot teuka.
 Keu peue areuta makanan damoh,
 oereueng saboh tan lôn eu na.
 Soë é' padjōh bah djimamoh,
 Lôn njoë saboh adeueb that djra.
 Ngon lôn marit tan meung sidroë,
 kamoë sidroë djeu'ōh bangsa.
 Salèh na oentōng oeroë doedoë,
 é' trōih keunoë ma'noesia."
 Poetroë djimoë kana bagoë,
 meuteutaloë srôt ie mata.
 Hana adoeen tan na adoë,
 ajah ngon ma droë oeleue naga."
 Lom oe langèt njan djitangaih,
 leubèh djidjaih poetroë moeda.
 Manjang langèt lanam leupaih,
 ba' Alah jōh njan djipinta.

„Ja Ilahi hé ja Rabbi,
 gata grani that bit kaja.
 Doempeue haj lôn neukeutahwi,
 doem teukeudi kadla kada.
 Lôn that malang meunoë bahgi,
 han soë oengki boeet di gata.
 Neupeulheueh lôn ba' Glé Lawi,
 ba' tō' neubri oereueng teuka.
 Peue djeuet lôn doe' lam meuligoë,
 até teugoë-goë lôn ka raja.
 Hana goena lawét sinoë,
 oereueng lakoë lôn meuhawa.
 Neutoelông kamoë Toehan 'alam,
 oeroë malam dalam doeka.
 Neupeutrōih njang lôn meudeundam,
 oereueng agam beutrōih teuka.
 Bit pi doë na ajah di kamoë,
 tan sibagoë khoeloe' roepa.
 Ajah boenda naga seureuloë,
 ban doea droë marit hana.
 Bit pi meunan lôn han ingkeue,
 beuthat oeleue lam ingat na.
 That geugaséh geubri doempeue,
 han geutoepeue tjit meung bahsa,
 Geupeugèt meuligoë di ateueh glé,
 gaséh até silagoëna.

Peue njang lōn niet trōih lé hasé,
 doeageu saré gaséh meusra.
 Sabab hana sa misé kamoé,
 njan djeuet lōn njoë doekatjita.
 Lōn njoë 'oemoe ka balèh droë,
 oereueng lakoë bri peunawa.
 Njankeu sabab hé Toehankoe,
 lōn that toenoe até roegha.
 Droëneu Toehan moerah ma'moe,
 lōn neubantoe hé Ta'ala."
 Meunan doe'a Poetroë Siti,
 Toehankoe Rabi peutrōih pinta.
 Bitpi trōih hana moebahgi,
 djitjo' lé mi doedoë teuma.
 Prang raja that dalam la'ōt,
 poetroë djireubōt lé ma naga.
 Kandjamara rèt meula'ōt,
 ba ploeeng reubōt Poetroë Naga.
 Teutab 'ohnoë saboh roehé,
 sidjoe' até leuboej dōda.
 Ba' si'oeroë Poetroë Siti,
 dja' oe pasi binèh la'ōt.
 Pilèh kreueng ngon sipōtbangsi,
 padjōh Poetroëti asoë djitōt.
 Niba' Alah doem teukeudi,
 Djōhari mata oe la'ōt.

Lam alōn reujeue' oelèe ili,
 djeu'ōh biti la'ōt raja.
 Sipōt ngon kreueng ka meutamon,
 mata neukalon oebea' béhtra.
 Teukeudi Ilahōn Manan,
 toë lé keunan kapaj teuka.
 Di djara' kon lam arōngan,
 nahoeda gèt roeman djilhōh dōnja.
 Djimat toeroepōng eu daratan,
 leumah jōh njan dji'eu roepa.
 Sidroë inong di binèh pasi,
 roepa na ri bintang kala.
 Kandjamara that beureuhi,
 hadjat oe pasi trōn lé sigrā.
 Keumeung paré'sa haba ngon proë,
 oereueng binoë ngondji hana.
 Leumah teuma ngon meuligoë,
 djroh seureuloë di glé raja.
 Poetroë di darat mata laloë,
 kapaj makén toë keunan teuka.
 Ka meuthōn-thōn dileè poeroë,
 han tom keunoë oereueng sapra.
 Djikalon oereueng le moepeudoë,
 oelah bagoë droë maniaga.
 Peuneudieng pi le sarat asoë,
 le doempeue njoë peutoë pi na.

Jōh njan teu'ingat doe'a saboh roë,
 moedahan djeunoë trōih ban pinta,
 Lom teu'ingat keu ma koe droë,
 naga doea njoë nan Goentala.
 „Salèh moseutadjeueb hadjat kamoë,
 lōn dja' ba' nanggroë la'én banda.
 Sajang keu ajah ngon ma wahwoë,
 geusangka lōn sinoë ka boeja ba.
 Teuntèe geumita keudéh keunoë,
 sajang neumoë njan bandoea.
 'Oh geuthèe na trōih oereueng lakoë,
 meuhat kapaj njoë é' binasa.
 Meung njo geukalon lōn lam la'ôt,
 seutèt geureubōt djeuet prang raja.”
 Meunan ingat Po sambinoë,
 meudéh meunoë doem dji'oera.
 Dalam atédji han moeproë,
 teu'ingat bie' droë ma'noesia.
 Dalam dōnja 'adat meunan,
 mita toenangan sabé moeda.
 Doem meukawén njang sipadan,
 inong njang ban balèh raja.
 „Lōn seutèt lakoë boeet njan patōt,
 rèt lam la'ôt lōn koeboengka.”
 Kleueng djimeusoe meuseu'ōt sambōt,
 kapaj meureunggōt mieng koeala.

Njoë Nahoeda lôn peuriwang,
 Panglima prang maniaga.
 Doem djeueb nanggroë djidjeumeurang,
 dja' meutandang kalon disa.
 'Oh trôih kapaj ka toë keunan,
 leumah roeman Poetroë Moeda.
 Roepa that djroh tan bandéngan,
 tan sipadan dalam dōnja.
 Teudoe' sidroë ateueh batèe,
 „Bah koetrōn kèe dja' paré'sa.
 Njeum lôn kapaj karam teuntèe,
 ba' lagèe kamoë eu roepa.
 Ada' meung han peue boet sinan,
 ngon sidroë tan koe'eu pi na.
 Njo keubit ban oelōn kheun njan,
 peutrōn sampan ban sineuna.
 Njan wadjéb ateueh geutanjoë,
 tatoelōng poetroë tatjo' sigra.
 Bah tapoewoë njan oe nanggroë,
 keu djoedō kamoë Po djroh roepa.
 Meunan 'adat dileè poeroë,
 toelōng geutanjoë peue binasa.
 Han lé piké pajah roegoë,
 Ban sinaroë meunan djeumba."
 Doemna keulasi peutrōn sambō',
 dajōng djirō' djigōt rata.

Sambō' djiploeeng ie moebilō',
 la'ōt harō' that tjéntjala.
 Kandjamara até mabō',
 moebō'-bō' di dalam dada.
 Djipeutrōn peudeueng oelèe meutampō',
 sikoereueng koerō' toeah raja.
 Ba' masa njan gala' kon lé,
 djimeusa'é djimeudōda.
 Gala'dji that tan simisé,
 na tamsé glé soekatjita.
 Ban saré trōih saleuem djibri,
 poetroë Siti seu'ōt sigra.
 Nahoeda djikheun „Seulamat djōhari,”
 neuseu'ōt „Gōseuti rahmat gata.”
 Lheueh njan djitanjong peue dji'eu ban,
 „Ngon sidroë tan ho leupaih ka.
 Lōn eu meuligoë ateueh glé njan,
 tapeugah kaman soë Po atra.
 Lōn that hireuen dalam até,
 indah boekon lé tan oepama.
 Djroh peuneugèt hoe moeblé-blé,
 di ateueh glé goenong raja.”
 Seu'ōt poetroë sinjom teukhém,
 „Atra lōn dalém bri ajahnda.”
 Nahoeda teupiké dalam dihén,
 „Poetroë njoë tjandén tan pat peusa.”

Djikalon indah mata ladat,
 jo meutat-tat djeueb angèeta.
 Rindoe até nabsoedji that,
 sang meularat ba' theun saba.
 Jōh njan djitanjong lom paré'sa,
 „Di pat disa gampōng gata.
 Ajah di gata radja raja,
 poetroë moeda gheun ba' njata.”
 Teuma djiseu'ōt geutanjong ban,
 „Lōn hina'an hé kaka'nda.
 Tan lōn toepat asaj toerōnan,
 ajah boenda nan oeleue naga.”
 Nahoeda hireuen that teutjeungang,
 djipandang njoë ma'noesia,
 „Petroë njoë naga peutimang,
 djitjo' ba' nang njoë ho djiba.
 Patōt djeunoë oelōn poewoë,
 koetoeeng keu binoë Po djroh roepa.
 Bah koeba ploeeng ba' masa njoë,
 koepoh djeunoë naga raja.
 Han koetakōt bahlé maté,
 bahlé reulé ngon-ngon béhtra.
 Sabab narit droë meunan djisé,
 han meusampé poetroë djiba.
 Djih keu tjoetti até rindoe,
 marit seu'oe lawan grada.

Kandjamara that meuseuhoe,
 sabé meu'eumpoe lam prang raja.
 „Meung na oentōng ba' alōn njoë,
 lheueh geutanjoë niba' mara.
 Bah lé ba' prang gata koepoewoë,
 djoedō kamoë lam atana.
 Lōn pi aneu' radja nanggroë,
 meugah han soë lam prang raja.
 Han lōn takōt djilét kamoë,
 lé barangsoë bah lé naga.
 Hé Poetroë Ra'na Keumala,
 njang gèt roepa tan sibagoë.
 Dja' sadjan lōn hé adé'nda,
 gata koeba njan ba' bie' droë.”
 Jōh njan djipeu'é' kapaj raja,
 dalam béhtra that seureuloë.
 „Hé adé' lōn intan sroëbroë,
 tapeudjō' droë ba' kaka'nda.
 Bè' tatakōt keu naga doedoë,
 di kamoë hana inanja.
 Meunjo geuproh kapajkoe njoë,
 njan barō roë balaih goena.
 Han lōn lawan doea gobnjan,
 droëneu laman njan Toean Tha.”
 Meunan narit djroh hana ban,
 djipeu'é' Toean Poetroë Moeda.

Djiseu'ōt ngon malèe-ile,
 „Bè' teukabō dalém radja.”
 Bōt ngon djaroë seumah lintō,
 ie mata rō seutèt dada.
 Djipeudoe' djaroë ateueh leumoeeng,
 „Lōn neuba ploeeng djeunoë sigrā.
 Reudjang sinoë njan tatimpeueng,
 bah seumeureueng la'ōt raja.
 Ajah ka lam glé ban doea droë,
 seupōt neuwoë djeunoë sigrā.
 Neu'eu tan lōn lam meuligoë,
 teuntèe keunoë neupeuteuka.
 Neuleungo lōn toekankoe droë,
 bè' rōh doedoë seusaj teuma.
 Oelōn njoë bie' hana moeproë,
 asaj di sinoë Poetroë Naga.”
 Ngon djimoë that meusō'-meusō',
 sang harō' la'ōt geuloera.
 Poetōih soeara meudjan han tō',
 djampoe ngon teusrō' djimoë roegha.
 Rō ie mata doe' teuseupō',
 droë djitoendō' moë han reuda.
 Nahoeda wa poetroë djipangkèe ō',
 pajoe poedjō' Kandjamara.
 „Bè' neuwa lōn Toeankoe droë,
 tan djroh meunoë boet di gata.

Bè' toewo keu Toehan sidroë,
 pi'é geutanjoë neu'eu doemna.
 Bandoem boeet neupiké dilèe,
 djeuet keu malèe doedoë teuka.
 Lôn njoë aneu' naga meuteuntèe,
 gata bie' soekèe aneu' radja.
 Ba' neupiké ngon 'èleumèe,
 bè' meuteumèe rōh ba' mara.
 Meung njo é' lheuēh neuba ploeeng kèe,
 gatakeu njang mēe djoedō hamba.
 Ada' han neutoeeng njan keu binoë,
 ridla lôn njoë djeuet keu dajang.
 Sidoemna boeet lam meuligoë,
 bah lé kamoë doee' lam ladang."
 Meunan djikheun masa djimoë,
 doem sinaroë weueh ngon sajang.
 Lom djikheun: „Ba' teumpat kamoë,
 le moepaloë meutang'ilang.
 Naga Goentala ngon ma poetroë,
 oeleue naga seureuloë ban Glé Lintang.
 Ba' piké lôn sang moepaloë,
 neuba lôn njoë meuhāt djeuet prang.
 Ba' that taploeeng po oe langèt,
 naga seutèt trōih djeumeurang.
 Ban doea sa'tidji that gèt,
 ho ta'isèt han djipantang.

Meung njo djithèe ka moepaloë,
 gètkeu djeunoë soerõt reudjang.
 Jõh goh djiwoë bagaih geutanjoë,
 hé Teungkoe droë radja seudang.
 Ajah boenda lõn le that sa'ti,
 djeunoë doeli gèt taboengka.
 Oereueng moeprang doea bagoë,
 atawa paloë talõ meunang.
 Meuhat roesa' bandoea sjhoë,
 roesa' roegoë 'oh ka djeuet prang.
 Ba' neupiké neuba lõn njoë,
 bè' seusaj droë njan han reumbang."
 Le peu'ingat doem djipoeproë,
 oelé poetroë hoe ban bintang.
 Jõh njan seu'õt Kandjamara,
 Djikheun haba djipeuseunang:
 „Bè' tatakõt doempeue mara,
 lõn adé'nda lawan moeprang.
 Asaj ka na ridla gata,
 lõn poh naga han lõn pantang."
 Meunan djikheun djimeuhaba,
 han djikira meutang'ilang.
 „Doempeue njan ka séb lõn piké,
 keu maté hana seunajang.
 Asaj gata poetéh até,
 naga oebé glé oelõn njang tjang.

Gata poetroë bè' so' até,
 di lôn sabé tjit dalam prang.
 Oeba' gata lôn kheun lhahé,
 njang poh maté geureuda toengang.
 Kamoë njoë nan Kandjamara,
 njang prang goera di awang-awang.
 Baranggasoë tan lôn taba,
 ra'sasa naga meutang'ilang.
 Ngon gata han lé lôn meutjré,
 haj boh até njang that hoe trang.
 Tan na seusaj doedoë akhé,
 bah lé maté didalam prang."
 Habéh pakat njan ngon piké,
 djipeulajeue lé kapaj reudjang.
 Djibôh lajeue mirah meuhé-hé,
 djiploeeng sabé kleueng teureubang.
 Areuta ngon alat lam meuligoë,
 doem sinaroë peusaka wang.
 Hana djiba oelé poetroë,
 takôt keu ma droë djiwoë reudjang.
 „Meung han bagaih njan taboengka,
 woë naga djipagab djiprang.
 Djiseunom ban doea keunoë teuka,
 binasa geutanjoë Tjoetbang.
 Ba' that ba' ta'eu sipeuet binatang,
 di lôn koesajang ajah ngon ma.

Ba' até lôn hana leukang,
 sitimang ngon langèt dônja.
 Teukeudi maté gobnjan ba' prang,
 boekon that alang wahé radja.
 Ni phôn tjoet kon neupeutimang,
 trôih'an seudang oebénoë ka.
 Hana patôt njan teu'ingkeue,
 beuthat oeleue ajah boenda.
 Han mée tjarôt tasoeet loeweue,
 bè' raboeë toeë takheun haba.
 Lagèe geukheun Hadih Madja,
 keu peungadja doem geutanjoë.
 Oereueng djameun peugah haba,
 toeeng meuleuha ban geukheun proë.
 „Bè' boeet gata hana meu'oh,
 pakon djoemoh njang kon djeumba.
 Bè' tathō' geumeuto tanoh,
 simalam beungoh han gadoh bisa.
 Keu poetroë roepa that indah,
 le leupaih oereueng meuhawa.
 Miseue boh Seureubasalah,
 roepa tjeudaih tan pat peusa.
 Gaséh sajang han pat keubah,
 tapadjōh maté mbah han maté ma."
 Meunan oepama poetroë peugah,
 teuhah babah Kandjamara.

Dji'ingat sang boh peudeundang,
 didalam djipandang asoëdji brō'.
 „Koegala' keu poetroë bintang,
 lôn koemoeprang di dalam lhō'.
 Ngon sabab njan wahé adoë,
 ridla lôn njoë sinoë doedō'.
 Han koetakōt baranggasoë,
 gata sidroë njang koedawō'.
 Bah tatinggaj ajah boenda,
 dalam rimba keunoë han tō'.
 Bah tinggaj doem sibarang na,
 doem areuta bè' tadawō'.
 Jōh njan kapaj djiploeeng hat kheue,
 djimeulajeue di dalam lhō'.
 Angèn djipōt sapeue-sapeue,
 djipeukeue lam la'at harō'.
 Han djeuet linteuing njan ngon djitham,
 boet Po 'alam Toehan sidroë.
 Bè' geutanjoë salah waham,
 doedoë kapaj lham tjo' aneu' droë.
 Naga Goentala sinan maté,
 geupoh meugoelé lé po nanggroë.
 Prang raja that tan simisé,
 goenoeng reulé ba' neutheun droë.
 Po nanggroë njan Teungkoe di Lhō',
 prang meudjaphō' njan ngon naga.

Phōn neumoeprang dalam loebō',
 hingga tō' oe la'ōt raja.
 Naga di glé dalam oeteuen,
 mita eumpeuen djeueb-djeueb oeroë.
 Até moebō'-bō' meunta'-meunteuen,
 djimakeuen teusrō' teupipoë.
 Peutjeunggot oelèe ban doea droë,
 oe meuligoë djingieng sigra.
 „Salèh peue-peue na moepaloë,
 di nanggroë keunoë oereueng teuka.”
 Leumah dji'eu kapaj lam alōn,
 Meu'é' meutrōn dji'eu roepa.
 Lam glé leumah kajèe meurōn-rōn,
 Jōh wa'tèe trōn naga raja.
 Binatang oeteuen ploeeng meuhimpōn,
 djiteureudjōn lam beuloeka.
 Habéh djiploeeng oeaba' doesōn,
 doem djitrōn teukeudjōt raja.
 Djikli' naga soe ban goerōh,
 oe djeu'ōh trōih leungo taga.
 Di seulitan soe that leusōh,
 that gadōh lam oeteuen rimba.
 Poetroë djikheun: „Toeankoe droë,
 sang geutanjoë teuka bahla.
 Neukalonkeu oeteuen doem meutampoë,
 ajah ma kamoë neutoepeue ka.

Soeara taga that seureuloë,
 ajah kamoë beungèh raja.
 Pakri djeunoë Toeankoe droë,
 teuntèe trōih keunoë njan ban doea.
 Han tom njang ka meunan meusoe,
 njeum that toenoe aneu' gob ba.
 Beungèh raja ma ngon po doe,
 ba' lakoe han lé meuriba."
 Ban lheueh poetroë narit djikheun,
 leumah lam oeteuen riōh raja.
 Djiploeeng binatang doem reuen mareuen.
 reubah meugeumpeuen kajèe doemna.
 Roepa ta'eu ban kiamat,
 doem latbatat habéh gabra.
 Oereueng lam kapaj doem meutat-tat,
 moeka poetjat darah hana.
 Han padoem tréb lheueh niba' njan,
 geu'eu teureuban kajèe rimba.
 Habéh reubah patah meukhan,
 han tatoeban peutjalitra.
 Ka meureuleue' oeneun ngon wie,
 ploeng doem kra krie loetōng bie' kra.
 Dji'eu oeteuen meuhaja' meugoempie,
 reuban lam ie aloee paga.
 Oereueng di kapaj kalon ba' glé,
 teumakōt até ban sineuna.

Djikheun „geutanjoë meuhat maté,
 djikabteu saré oelé naga.”
 Habéh bandoem jōh njan bō'bang,
 dji'eu meugoentjang goenong raja.
 Ada' na sajeueb djipo oe manjang,
 meunankeu sang ba' oepama.
 Lom djimarit poetroë seudang,
 „Tjoet abang pakri geutanjoë.
 Meuhat djeunoë ka djadèh prang,
 ma lōn ngon wang trōihneu keunoë.”
 Jōh njan kapaj djiploeeng tadjam,
 ban boh singgam angèn tampoë.
 Oe la'ōt oelèe djibeukam,
 dji'euntam lé barat toeloë.
 Poetroë djimoë saré ratèe,
 „Hé panghoelèe ingat keudroë.
 Djéh ajah neutjeunggot oelèe,
 pakri lagèe han lé lheuëh njoë.
 Djeunoë meuhat trōihneu keunoë,
 maté geutanjoë ban sineuna.”
 Doemna ra'jat ka djipoh droë,
 ban sinaroë jo meugeumpa.
 Naga djiklie' meutaga-taga,
 djihej aneu'nda poetroë sambinoë.
 „Bè' kaba ploeeng aneu' hamba,
 pakon gata han gèt bagoë.

Hé Kandjamara njang pantjoeri,
 pakon 'asi boeet han moeproë."
 Meunan djikheun lé Goentala,
 pangsang doemna ban sinaroë.
 Jōh njan hireuen po Nahoeda,
 dji'eu naga raja han soë.
 Na oebé glé badan meuhampa,
 ngon soeara njang ngo toeloë.
 Ka teukeudjōt Toean di Lhō',
 ka teuseupō': „Peue bahla njoë.
 Pakon naga djiteumawō',
 salèh na soë tō' ba ploeng poetroë."
 Sigra djitrōn dalam laōt,
 teureubéh srōt doem sinaroë.
 Habéh hantjō oeteuen garōt,
 ba' djireunggōt djih doea droë.
 Hibatdji that tan seunabé,
 djipeutjro' sabé tan piōh njoë.
 Kandjamara oetōih kon lé,
 kapaj djikabé djipeusiwoë.
 Naga tjeunggōt oelèe oe manjang,
 djipandang kapaj lam la'ōt.
 „Bè' kaba ploeng aneu' kamoë,
 poelang keunoë bè' kareubōt."
 Di ateueh oelèe Naga Goentala,
 le that tjoela djroh meu'atō.

„Wahé Radja Kandjamara,
 ingat gata djeunoë hantjō.”
 Han soë djeuet eu beungèhdji that,
 djih hibat leubèh le sa'ti.
 Niba' tjoela roengga madat,
 Gèt that teumpat djroh moebiti.
 Djihah babah ban goeha seunong,
 lhèe jō' oemong loeahdji na.
 Badandji raja na ban goenong,
 teubiet njawong soë eu roepa.
 Gigoëdji le that meuleulapéh,
 Poetéh-poetéh bé oe dara.
 La'öt djiseumbō saré poetéh,
 trōih keudéh ba' kapaj radja.
 Djilien lidah panjang kon lé,
 na oebé seuladang raja.
 Soë njang eu sinan lé maté,
 han woë saré sinan pahna.
 Matadji hoe na ban kilat,
 raja meuhat ban peudeuna.
 Doemnankeu haj pakri hibat,
 jo meutat-tat soë eu roepa.
 Sisé'dji le loeah teulheueng,
 oebé-bé bideueng oemong raja.
 Poeléh itam doem meuleueng-leueng,
 siréb roeng pantjawareuna.

Hana saboh djidjeuet peutoë,
 asoë boemoë Poelo Roedja.
 Han é' sipeuet teupeugah proë,
 roepa bagoë oeleue naga.
 Peue meuroempa' djih doea droë,
 binasa lé njoë ban sineuna.
 Han é' habéh lôn kheun bagoë,
 koeweut djaröë hè' angèeta.
 Raja panjang beutatoeban,
 lhèe reutōih ribèe lapan sipat deupa.
 Oebé glé tjoet badandji njan,
 geukheun meunan ba' tjalitra.
 Djih peuet gaki na ban Boetjoh,
 njang meurawoh dalam rimba.
 Na tom ta'eu roepa Boetjoh,
 djiploeeng gèhgoh tadjam raja.
 Peue meuroempa' ngon djih meukōng,
 doem poentōng ba' kajèe rimba.
 Neuraja badan na peuet go krōng,
 peue meusigōng doem binasa.
 Di naga pi meunan njan meugaki,
 Han soë toekri é' peunjata.
 Malingkan njang thèe Toehan Rabbi,
 Doem neutoekri droëneu peuna.
 Naga djikheun „Ingat koeheumpaih,
 kah han leupaih peue kasangka.

Wadjéb djeunoë aneu' kapoelang,
 jöh goh koetjang kapaj gata.
 Na kaleungo wahé pawang,
 bè' moewajang Kandjamara.
 Di kèè hana kah koetipèe,
 bè' kakatjèe ba aneu'nda.
 Hana gèt meunan kameulagèe,
 riwang dilèe keunoë sigra."
 Kandjamara seu'öt meunoë,
 „Tjoet Poetroë njoë djoedō hamba."
 Djipeulajeue keudéh keunoë,
 moewoë-woë lam la'öt raja.
 Si'at oe timoe teuma oe barat,
 ka djeu'ōh that teusreueng naga.
 Teuma djiriwang peutjro' karat,
 meugō-gō bakat ie moeboera.
 Béhtra raja ban aneu' glé,
 harō' kon lé bakat toeha.
 Djibeudoih reujeue' ban-ban goenong,
 meudjan teudong kapaj raja.
 Kapaj djipeutjro' la'öt meudeuroe,
 taleungo soe that meutaga.
 Han é' djiteumèe kapaj ladjoe,
 oelèe oe timoe djipeugisa.
 Dalam la'ōh djimeuta' tham,
 naga agam beungèh raja.

Hana djiseupot njan djipeulham,
 bè' karam maté aneu'nda.
 Djiseumpom ikoe keunoë keudéh,
 that djigaséh keu aneu' droë.
 Poetroë moë ie mata tiréh,
 meunoë meudéh kheun ba' lakoë.
 „Wahé dalém beu le gaséh,
 ajah ngon ma téh bè' moepaloë.”
 Djiseu'öt lé radja poetéh,
 „Bè' le reuntéh Toean Poetroë.
 Meung njo kapaj lôn djipoepaloë,
 ngon peudeueng njoë koetjang naga.
 Dilèe pi ka jōh saboh roë,
 peudeueng njoë ngon tjang geureuda.
 Njoëkeu peudeueng nan Tjeundawi,
 peusaka ba' Ni Éntoe Podja.
 Dalam prang hana tom keudji,
 Doem koetadi han koetaba.
 Naga djitadjō ho makén toë,
 keulasi moë ban sineuna.
 Djibeudoih goeloembang harō' toeloë,
 meudja' moewoë kapaj raja.
 Djibeudoih alōn ban-ban boekét,
 kapaj djilét oelé naga.
 Wie oeneun sabé djipeulét,
 djimeung seupét Kandjamara.

Poetroë Moeda that teumakōt,
 ie mata srōt meuleuloemba.
 „Bè' goendah dja' lōb lam boekōt,
 lam la'ōt oelōn biasa.
 Sabé lōn moeprang hana padoë,
 sabé di kamoë gli mi tan na.
 Gata poetroë bè' lé tamoë,
 tapeudjō' droë ba' Rabbana.”
 Poetroë djingiang ateueh radja,
 beuhe han soë kha lagoëna.
 Njokeu aneu' Pahlawan raja,
 bie' tjang geureuda poh ra'sasa.
 Djimat di djarōë peudeueng Tjeundawi,
 peusaka ba' Ni Éntoe Podja.
 Di nanggroë Rōm Datoe Nini,
 seuneulheueh bahgi Kandjamara.
 Jōh masa prang Anta Beuranta,
 geureuda maté djireupang,
 Tadjam pi that hana tara,
 mata raja peuet ōn pisang.
 Lom djikheun ba' Poetroë Naga.
 njang meutjahja ban boeleuen trang:
 „Gata adé' bè' moë roegha,
 ajah boenda han. oelōn tjang.
 Gobnjan lōn niet njan Toëan Tha,
 meung njo hana kapaj neugoentjang.

Han lōn lawan njan bandoea,
 lōn saba gata that sajang.
 Meung ka geuproh njan kapaj kèe,
 njan barō mée gobnjan koetjang.
 Bè' seusaj droë oeroë doedoë,
 kon salah kamoë njang aneu'nda.
 Han lōn takōt naga doea droë,
 bah keunoë teuka sila'sa."
 Kandjamara teukabō han soë,
 di keue poetroë peugah haba.
 „Lam prang sabé hana padoë,
 ta'eu go njoë oelé gata.
 Leubèh djroh njan bè' tamoë lé,
 peuseunang até peugèt bahsa.
 Leubèh gèt meusa'é-sa'é,
 taroehé peue njang tahawa.
 Kapaj djigisa wie ngon oeneun,
 meudjan djikeudeun djidong sigra.
 Poetroë Naga djimeudjangeun,
 sa'é djikheun ma djidōda.
 „Hé Po Ma lōn neupeu'ampōn,
 kon salah lōn Po Nahoeda.
 Salah gobnjan meupeu'ampōn,
 lōn seu'ōn ateueh djeumala."
 Djipeutjro' keudéh njan ngon keunoë,
 meugoemoë lam la'ōt raja.

Hana teudōh meudja' moewoë,
 na sang bagoë meu'ën singa.
 Dalam la'ōt naga tjakroem,
 reujeue' 'am'oem djhoe moeboera.
 Ngon soe taga 'oh djitjeuproem,
 meugoem-goem ba' Teungkoe Tapa.
 Bit pi meunan teumakōt poetroë,
 takōt moepaloë ajah ngon ma.
 Djimeudoe'a sara djimoë,
 ba'é' leupaih droë mara bahja.
 „Ja Ilahi ja Toehankoe,
 seulamat po doe lōn njan ngon ma.
 Peuleumoh até ajah bè' toenoe,
 keu Toeankoe Kandjamara.
 Dalam até ba' neubri pham,
 Bè' lé neutham oelōn geuba.
 Gobnjan ajah njang lōn deundam,
 oeroë malam toewo hana.”
 Haba poemeutjro' lōn pseudoe' si'at,
 lōn riwayat Teungkoe Tapa.
 Teungkoe di Lhō' teukeudjōt that:
 „Salèh kiamat hat trōih geumpa.”
 Jōh njan neubeudoih neudong leugat,
 peue 'alamat taga raja.
 Teuma neuthèe prang meukarat,
 naga djoengkat aneu' gob ba.

Teungkoe Lhō' Tapa' Toeān that keuramat,
 disinan ba' teumpat doe' neutapa.
 Oeroë malam 'am 'ibadat,
 poedjoë Hadlarat Toeān Asa.
 Njang la'én hana neu'ingat,
 akhirat njang keukaj baka.
 La'én bandoem tan neuminat,
 djeuet keuramat dalam dōnja.
 Doe' teupakō malam oeroë,
 neupoedjoë Alah Ta'ala.
 Sabé meunan hana padoë,
 droëneu laloë lam takoewa.
 Rindoe keu Toeān peudjeuet 'alam njoë,
 sabé neumoë ngon ie mata.
 Neumeudiké hana laloë,
 hana soenjoë sikléb mata.
 Ba' si'oeroë teungoh seumajang,
 teuka bimbang dalam dada.
 Jōh njan atēneu that bō'bang,
 tan lé seunang kon ban njang ka,
 Neuleungo taga that meu'oe-'oe,
 sang lakoe kiamat dōnja.
 Kilat blajblōj geulanteue meusoe,
 la'ōt djoe dji'é' ie beuna.
 Meusoe geulanteue di ateuh glé,
 njeum ka reulé nanggroë dōnja.

Goerōh raja tan seunabé,
 ie dji'é' lé meugeuloera.
 Teukeudjōt Teungkoe lam seumajang,
 neusaleuem reudjang dja' peunjata.
 Neu'eu lakoe doem neupandang,
 kiamat sang boemoë dōnja.
 Binatang lam glé ploeeng doem bimbang,
 meutang'ilang ban sineuna.
 Kareueng ngon batèe meugoentjang-goentjang,
 boemoë meulinggang njeum meugisa.
 Ban silingka Teungkoe pandang,
 leumah meudjoehang di la'ōt béhtra.
 Kapaj raja that lom ngon panjang,
 meunanjang sireutōih deupa.
 Teungoh meulajeue lam geuloembang,
 naga sipasang peutrjo' béhtra.
 Peue sabab njang djeuet meusagang,
 ngon kapaj prang Kandjamara.
 Neuthèe lé Teungkoe djitjo' poetroë,
 „Koetoelōng djeunoë ma'noesia.
 Bahlé djiba poewoë oe nanggroë,
 bè' lé sinoë dalam rimba.”
 Habéh neuma'loem ban sinaroë,
 asaj paloë beungèh naga.
 „Bah koetoelōng kapaj ba poetroë,
 na moewoë ba' ma'noesia.

Mangat lheueh ba' naga binatang,
 bah koemoeprang djeunoë sigrā.
 Patôt koetoelōng Radja seudang,
 peulheueh bintang niba' mara.
 Meung njo koetoelōng Naga Sa'ti,
 han lheueh Poetroëti trōih'an toeha.
 Gêtkeu at njoë djih koetadi,
 hana koebri djih peulahra.
 Ma'noesia njan bangsa kèe,
 si geukhoh oelèe go njoë pahna.
 Koepoh maté bah lé lajèe,
 gadoh euntèe lam ie raja."
 Meunan neukheun oelè Teungkoe,
 djibeudoih hoe lé ngon mata.
 Neutjo' leumbéng ngon seumamboe,
 aténeu toenoe silagoëna.
 Neungoej peukajan ikat seureuban,
 raja han ban koelah kama.
 Kapa' toengkat neumat jōh njan,
 Alah Toehan njang toebé na.
 Leubèh niba' brat sila'sa man,
 droëneu njan raja lagoëna.
 Neubeudoih dong lé disinan,
 neugrōb jōh njan loempat sigrā.
 Neulangkah ba' saboh tandjōng,
 Goenong Meu'oedjōng nan gob bōh gla.

Disinan djroh ba' meulindōng,
 neuprèh djikōng keunan naga.
 Di likōt njan raja that batèe,
 ba' meusilèe Teungkoe Tapa.
 Jōh njan neudeumpé' soe meutèe-tèe,
 na sang lagèe goerōh raja.
 Naga Goentala riwang ba' Teungkoe,
 djipoh ngon ikoe ba' glé raja.
 Ban neukalon meunan lakoe,
 ladjoe neupaloe neupoh naga.
 Goentala makén that seu'oe,
 djipoh Teungkoe han djitaba.
 Naga raja djihah ladjoe,
 djimeung kab Teungkoe ba' binasa.
 Neupoh naga neutindan-tindan,
 rōt seureuban lam la'ōt raja.
 Han djeuet neutjo' lé seureuban,
 ka djitjrie' njan oelé naga.
 Ba' binèh njan le that batèe,
 doem meuteuntèe raja-raja.
 Goeloembang meuta' that meu'èe-èe,
 ateueh batèe meugeuloera.
 Doem teumakōt njang dja' keunan,
 soesah han ban rèt talata.
 Meung han ingat ba' tadjaja' njan,
 srōtteu sinan maté pahna.

Goeloembang meusimbō djipoh batèe,
 meuseubèe le njang binasa.
 Djipoh reujeue' meudabèe-dabèe,
 sinan tan padèe ie moeboera.
 Takalon bakat bitjah meukoeboh,
 seupōt beungoh teudōh hana.
 Ba' srōt seureuban ta'eu that djroh,
 wa'tèe soeboh sidjoe' mata.
 Ba' teumpat Teungkoe neumoeporang,
 neutob neutjang sinan naga.
 Prang raja that meutang'ilang,
 la'ōt meugoentjang djeuet ie beuna.
 Ban doea teuga boekon lé,
 é' reuloih glé beukah doea.
 Goenong beukah kareueng reulé,
 naga oebé glé loeka dada.
 Sinan Teungkoe prang meukatjhō',
 naga neu'euntjhō' hana reuda.
 Jōh njan djiseunom oe dalam lhō',
 darah meukeubō' doem moeboera.
 Djikli' naga soe that leusōh,
 na ban goerōh toepheuen raja.
 Djipeugah droëdji loeka toebōh,
 „Lōn djoedō beh ka binasa.
 Gata poetroë ba' gèt kawaj,
 bè' lheueh kapaj njan djiboengka."

Djiseumpom droë meukoewaj-koewaj,
 djikli' toendjaj radja naga.
 Djipoh ngon ikoe djeueb-djeueb poelo,
 neumeusilo Teungkoe Tapa.
 Kapaj pi djiploeeng tadjam meuso,
 leupaih poelo la'öt raja.
 Naga inong seunom oe keue,
 kapaj meulajeue ka djisangga.
 Sinan sabé njan djikiweue,
 ban geulanteue soe djitaga.
 Naga Goentala that djipoh droë,
 teupoerō sinaroë kareueng njang na.
 Sröt koepiah ba' meusiloë,
 rab moepaloë Teungkoe Tapa.
 Seureuban gadoh njan ngon toengkat,
 droëneu pi rab sröt meupoeta.
 Adat kon teuga njan neumoemat,
 droëneu leugat hilé ie ba.
 Bit sidoemnan tan teumaköt,
 neugrōb lam la'öt njan neumita.
 Neugie koepiah toengkat ka sröt,
 dalam la'öt ie moepoeta.
 Sabab naga seumpom ikoe,
 la'öt djoe darah moeboera.
 Toengkat seureuban ka lham ladjoe,
 ie la'öt hoe mirah doemna.

Tō' 'an djeunoë tan moeminah,
 sinan leumah ta'eu njata.
 Koepiah toengkat raja leupaih,
 poetja' Seulawaih rab sabé sa.
 Teutapi ka djeuet keu batèe,
 dja' eu lagèe soë njang hawa.
 Teupat neudong that meuteuntèe,
 dja' kalon teuradjèe jōh prang naga.
 Jōh njan toengkat han é' bōt lé,
 siba' kajèe glé njang that raja.
 Na ban keupō' leumah lahé,
 panjang kon lé reutōih deupa.
 Bandoem njan ka djeuet keu batèe,
 kon lé kajèe ta'eu roepa.
 Meunankeu haj masa dilèe,
 that meuteuntèe doem mantong na.
 Lam kareueng la'ōt that moepatja',
 misé toemba' teuglong mata.
 Roepa itam that sinan teupatja',
 lam reujeue' meuta' la'ōt raja.
 Teudoe' si'at njan haba prang,
 lōn riwang ba' kapaj boengka.
 Ka djeu'ōh that djidjeumeurang,
 djipeuseunang la'ōt raja.
 Njoë lōn kheun haj naga agam,
 droë djireundam lam ie raja.

Djigeumeutjie' that geumeuntam,
 djipeugah ragam oebea' dara.
 Naga djikheun: „Wahé adoë,
 lôn ba' go njoë ka tjeuleungga.
 Salèh maté lôn hé Poetroë,
 aneu'teu sidroë hoekōm gata.
 Wahé adé' kapaj tatham,
 tapeukaram bah binasa.
 Lôn ka tjidra keunong tikam,
 salèh karam maté pahna.
 Peunjeum lôn hana poeléh lé,
 keunong ba' até toemba' raja.
 Taproh kapaj tapeureulé,
 bè' le piké djeunoë gata.”
 Naga Goentala djipoh-poh droë,
 sakét han soë sabab loeka.
 Loekadji njan sang moepaloë,
 salèh sabab njoë adjaj teuka.
 Dalam la'ôt djigoelé droë,
 inong djimoë trō ie mata.
 Dji'eu lakoë ka moepaloë,
 teumakōt keudroë dja' toeeng bila.
 „Salang lakoë lôn njang sa'ti,
 keunong tadi é' binasa.
 Han koepeutoë oebea' sjoëkhi,
 tan beurani prang koepoega.

Gèt koeseutèt aneu'koe poetroë,
 koeproh djeunoë kapaj radja.
 Koetjo' aneu' njan koepoewoë,
 han ridla kamoë djih keumeung ba.
 Bah doedoë koetoelōng lakoë,
 gèt djeunoë poetroë koehila.
 Bè' djan leupaih djiba ploeeng poewoë,
 soesah kamoë doedoë teuma."
 Meunan djipiké naga inong,
 kapaj njan teudong djitheun sangga.
 Djipeusa' droë ikoe djiglong,
 béhtra njan keunong kareueng raja.
 Naga agam jōh njan djihéng,
 djikeureuléng Teungkoe Tapa.
 Sakétdji that keunong leumbéng,
 moepaténg djisoeet djihila.
 Lam la'ōt darah meuhambō,
 ie hidjō djeuet mirah doemna.
 Doemnankeu le teubiet darah,
 la'ōt mirah ban keusoemba.
 Naga Goentala mabō' darah,
 habéh djiplah poelo njang na.
 Keudéh keunoë ikoe djiheumpaih,
 djeuet keu beukah ban sineuna.
 Oe Poelo Panjang droë dji'oeloe,
 djipoh ikoe hana reuda.

Mata-matadji ka sapoe,
 dji'é' ladjoe keunan landja.
 Poelo njan oebit panjang leusöh,
 jöh njan poetöih djeuet keu doea.
 Beuladéh leupaih dji'é' ka tröih,
 poelo njan poetöih ba' 'euj naga.
 Toë sinan deungon Baköngan,
 soë gala' njan dja' peunjata.
 Djeuet keu pantön oereueng sinan,
 han oebah ban lagèe dōda.
 „Dilèe geupeunan Poelo Panjang,
 djeunoë geuhej nan Poelo Doea.
 Peukeu sabab njang djeuet meunan,
 njang plah poelo njan naga loeka.”
 Haba Poelo sébkeu 'ohnoë,
 naga poh droë dji'euj landja.
 Di sinan lom djidjoelō droë,
 tröih tanggoë ba' Poelo Raja.
 Poelo Raja djikheun Gadang,
 bahsa oereueng njan Aneu' Rawa.
 Naga dji'é' sinan oe manjang,
 kareueng leukang djeuet keu paja.
 Beukah Poelo njan moepita'-pita',
 Poelo Banja' gob bōh nama.
 Djeuet tadja' eu ada' na gala',
 kon boeha' kamoë peuhaba.

Doem na dali e teungkoe oetöih,
 tadja' ba' tröih bè' so' sangka.
 Ban haba njoë keubit soenggōh,
 tan kamoë bōh narit seunda.
 Naga loeka teudoe' 'ohnoë,
 djeunoë lōn poewoë kapaj boengka.
 Naga inong até wahwoë,
 meudoe'a droë ba' Rabbana.
 Naga inong njoë lōn kisah,
 atédji soesah hana bagoë.
 Djipeudjō' droë oe'ba' Alah,
 mata djidjaih sabé djimoë.
 „Ja Toehankoe neukalon keu lōn,
 tan salah lōn dalam boet njoë,
 Njang djeuheut teungkoe keu oelōn,
 djitjoe' aneu' lōn Toean Poetroë.
 Teungkoe Tapa njang doe' di Lhō',
 lakoë geu'euntjhō' djéh ka paloë,
 Lōn tham kapaj bè' leupaih pawō',
 ba' keunong Boerō' lam la'öt njoë.
 Lōn meung moeprang lawan Teungkoe,
 até koejoe oereueng binoë.
 Salang lakoë njang meuseuhoe,
 keunong paloe ka teupipoë.
 Sang teumakōt ba' ri lakoe,
 kamoë neubantoe ja Mèelana."

Meunan doe'a droë djingadoe,
 até toenoe djimoë roegha.
 Djikalon Teungkoe that djitaköt,
 jōh njan djisoeröt droë djihila.
 Djikarat lé seunom oe la'öt,
 djiseutèt di liköt Kandjamaara.
 Lheueh djipeudjō' droë ba' Alah,
 djimita ilah jōh njan sigra.
 Kapaj raja na bè' leupaih,
 ie djiboengkaih djiprōih ladja.
 Djiseumbō sabé that meugram,
 Kandjamaara han djeuet djigrada.
 „Bahlé teuloengkob koepeukaram,
 aneu' agam sa'ti raja.
 Koebloë maté ba' oeroë njoë,
 aneu'koe poetroë njan koehila.
 Bahkeu doedoë koe'eu lakoë,
 'oh lheueh aneu' droë niba' mara.
 Meung njo djeunoë koeseutèt gob njan,
 aneu'koe toean leupaih gob ba."
 Weueh that atédji hana ban,
 djipeutjro' jōh njan tadjam raja.
 Lam até batjoet teumaköt,
 djitaköt keu Kandjamaara.
 Kajém tjit droë njan djisoeröt,
 ikoe djikawöt djitheun sangga.

Djikira saban lagèe Teungkoe,
 njankeu koejoe dalam dada.
 Ada' meung djithèe la'én lakoe,
 sigo djipaloe lham lé landja.
 Naga djikheun „Hé pantjoeri,
 poelang Poetroëti ba' lôn sigra.
 Pakon gata 'akaj doesi,
 han gèt beugi si geukoh pha.
 Ba' ta'ingat djeunoë keudroë,
 han lheueh sinoë peue takira.
 Dalam boeet njoë kon salah kamoë,
 doem salah droë niba' gata.”
 Naga meusoe djitaga pōh,
 soe leusōh geulanteue raja.
 Djiglong ikoe ie doem djiprōih,
 la'ōt kirōh meugeuloera.
 Kapaj ka djeu'ōh lheueh niba' Lhō',
 naga meukeubō' ie djiboera.
 Ta'eu di darat leumah ban sambō',
 djeu'ōh niba' Lhō' la'ōt raja.
 Teungkoe di Lhō' njan ka neuwoë,
 neu'eu kapaj njoë lheueh ba' mara.
 Tan neutoepeue lom moepaloë,
 boeet binoë Naga Goentala.
 „Bah ba' gadoh toengkat koepiah,
 njang ka djiplah oelé naga.

Goenong raja pi ka beukah,
 asaj ka leupaih poetroë djiba."
 Neuwoë Teungkoe oebea' teumpat,
 poeboeet 'ibadat misé njang ka.
 Aténeu mangat poedjoë Hadlarat,
 „Naga djoengkat ka binasa."
 Tan neupiké kapaj ka leupaih,
 djeuet keu soesah neuthèe hana.
 Naga inong seutèt meutjraih-tjraih,
 ie djiboengkaih meugeuloera.
 Ban djikalon sabé djipeutjro',
 jöh njan teukho' Kandjamara.
 Djipröih ie la'öt droë djipado',
 kapaj ka so' lam kareueng bha.
 Djipeulajeue makén tadjam,
 hana hiram aneu' radja.
 Ba' djikabé koemoedoë meutam,
 patah oeram ka binasa.
 Kapaj djitadjō dalam kareueng,
 ka seumeureueng so' lé sigra.
 Lam kareueng djaj ka seumeureueng,
 djikli' oereueng ban sineuna.
 Ladōm djibeuet peue njang djeuet droë,
 le doem poh droë toembō' dada.
 „Ba' siseun njoë maté di sinoë,
 oe nanggroë han lé tagisa."

So' di sinan han meugra' lé,
 bakat oebé-bé harō' raja.
 Ra'jat reujōh meutégoeblé,
 gadoh piké Kandjamara.
 Naga kalon kapaj ka so',
 poetroë njan djitjo' lé ngon sigra.
 Djiprōih ie la'ōt 'oh meudo'-do',
 habéh piro' oereueng njang na.
 Djiba ploeng bagaih ban seuligoë,
 dja' mita lakoë njang ka loeka.
 Aneu'dji poetroë ba djeueb sagoë,
 sara djimoë ngon ie mata.
 Dji'ingat keu djoedō ka moepaloë,
 „Salèh pat djeunoë njan geumeusa.”
 Habéh djidja' eu djeueb lingkōng njoë,
 tan meuboenjoë djingo haba.
 Naga inong soesah até,
 djeueb loeweue' glé djidja' mita.
 Hana meuteumeung djeueb sagaj bé,
 „Salèh ka maté ie raja ba.”
 Meunan teusréh dalam até,
 ilé sabé ngon ie mata.
 Djidja' mita jōh njan sabé,
 dji'é' oe glé dja' djeueb goeha.
 Hana meu'oh oedéb maté,
 djeueb pawō' glé aloee paja.

Goh lom moepat djidja' sabé,
 gadoh piké ngon bitjara.
 Lam djidja' njan ie mata srôt,
 djeunoë oe la'öt moewoë haba.
 Kapaj ka so' ie pi soerôt,
 'akaj loepöt Kandjamara.
 Dalam kapaj Nahoeda djimoë,
 ingat keu poetroë ka naga ba.
 Djimeung seutèt tan lé moeproë,
 ka paloë dalam kareueng bha.
 Ba' oelèe naga dji'eu poetroë,
 radja njan moë that bit roegha.
 Djikeymeung reuböt taköt paloë,
 han leupaih droë lam ie raja.
 Naga inong djilinggang-linggang,
 meunang lam prang ngon Nahoeda.
 Djitjo' aneu' djitimang-timang,
 djidjoelang ateueh djeumala.
 Sang djiteumèe glé malakat,
 djidja' leugat tadjam raja.
 Lam la'öt raja djiba leugat,
 niet boelat lakoë djimita.
 Ngon teukeudi niba' Toehan,
 kapajdji njan djeuet keu Beuta.
 Ngon-ngon oereueng bandoem sadjan,
 teutab sinan minah hana.

Habéh bandoem djeuet keu batèe,
 meunan dilèe jōh prang naga.
 Alat ngon oereueng habéh lajèe,
 malang meuteumèe droëdji pinta.
 Kandjamara droë djilakèe,
 ba' djeuet keu batèe djimeudoe'a.
 Oe nanggroë han lé djikatjèe,
 dji that malèe poetroë hana.
 Njankeu sabab djilakèe droë,
 ba' tō' 'an doedoë djeuet keu tanda.
 Sinankeu djeunoë doem moebagoë,
 dja' eu keudroë soë njang hawa.
 Gob kheun nan Batèe Meulajeue,
 goeloembang kheue harō' raja.
 Ta'eu di djeu'ōh ban kapaj lajeue,
 bitjah meugeutjheue ie meuboera.
 Batèe njan di teungoh la'ōt,
 wa'tèe ie soerōt leumah hampa.
 Leumah di djeu'ōh meukawōt-kawōt,
 reujeue' djihoegōb ban silingka.
 Han that djeu'ōh ngon Tapa' Toeana,
 siteuntang njan Samadoea.
 Ba' ingat meulajeue keunan,
 le sinan oereueng binasa.
 'Oh djan moesém la'ōt harō',
 goeloembang meu'euntjō' that meutaga.

Soë njang leungo doem teuseupō',
 soe meutawō' sang moë roegha.
 Meunan meusoe 'oh djan harō',
 nahoeda tawō' poetroë moeda.
 Batèe njan na misé Boerō',
 reujeue' euntjhō' hana reuda.
 Djeuet keu dali trōih 'an djeunoë,
 sinankeu paloë Kandjamara.
 Hana djiwoë lé oe nanggroë,
 seutèt poetroë njang naga ba.
 Salèh djeuet djih la'én bagoë,
 tan tō' thèe njoë njang peuhaba.
 Lōn piké ba' ambat kamoë,
 djih sinaroë djeuet keu Beuta.
 Le that dali djeuet keu boënah,
 doem leumah takalon njata.
 Misé toengkat ngon koepiah,
 goenong beukah ba' poh naga.
 Misé njang ka kamoë kisah,
 hana oebah njan bandoem na.
 Dja' takalon doem tapeusah,
 njang lōn peugah bit sabèt na.
 Di Loebō' Bajé' djameun dilèe,
 leumah teuradjèe le that tanda.
 Saboh meunasah raja teuntèe,
 ba' meusilèe Teungkoe Tapa.

Ba' masa njoë njan ka gadoh,
 ka reuloih 'oh lheueh prang naga.
 Dji'é ie la'öt ngob doem reuloih,
 habéh djiboih lé ie beuna.
 Njang na leumah euntjit tapa',
 jöh neutindja' grōb ba' naga.
 Le that oereueng keunan djidja',
 meusa'-sa' dja' peulheueh nada.
 Maséng-maséng ban njang ka'ōj,
 meukeupōj keunan djiteuka.
 Njang mē kamèng boengong toengkōj,
 meudjahōj poepandji djiba.
 Euntjit tapa' panjang leupaih,
 kira ngon haih siplōh deupa.
 Teuma bideueng njan neuloeaih,
 sipat haih doea deupa na.
 Batèe nisan doea sipasang,
 ta'eu meureuntang teupat bandja.
 Oeba' piké 'oh tapandang,
 meuhat na sang oereueng poela.
 Djibōh tanda misé koeboe,
 meuseuhōe keuramat raja.
 Tapa' djisangka djeurat Teungkoe.
 oereueng meu'oe-'oe peulheueh nada.
 Ban silangka djeurat tapa',
 ta'eu meuhala' le that broee'tja,

Broee' kreueng raja han é' soë gra',
 ie meulimba' peunoh rata.
 Njan broee' kilat kima la'öt,
 salèh soë angköt keunan djiba.
 Raja-raja han é' soë böt,
 tjahja blatblöt oeroë timpa.
 Peunoh ie oedjeuen di dalam njan,
 soë dja' keunan doem srah moeka.
 Inong agam djidja' keunan,
 seutanggi koemoenjan le that djiba.
 Djitöt sinan ba' djeurat tapa',
 bèe meuhaja' gahroe djeumpa.
 Djipageue djibōh djeureudja',
 lé oereueng dja' djipeulahra.
 Ban peuet sagoë djroh meusiga',
 soë njang dja' até teuboeka.
 Meulia kon lé koeboe tapa',
 keunan djidja' peulheueh nada.
 Ramè sabé geunab oeroë,
 hana soenjoë oereueng teuka.
 Meung na soesahan dalam nanggroë,
 doem sinaroë trōn meudoe'a.
 Oeba' djeurat tapa' Teungkoe,
 meu'oe-'oe haloean djiba.
 Keunan djitrōn leubè teungkoe,
 peue njang nabsoe djimoepinta.

Reudjang kaboej bri Toehankoe,
 beureukat Teungkoe njang Êelia.
 Keuramat tapa' that meuseuhoe,
 barat timoe doem gob thèe na.
 Ba' that njang sisat dja' lam oeteuen,
 djimeu'inseuen keunan sigra.
 Oetang gob bajeue han lé meutheun,
 meung njo djikheun sinan nada.
 Ada' njang sakét poeléh ladjoe,
 oeba' Teungkoe nietdji njan na.
 Alah peupoeléh njang meudajoe,
 beureukat Teungkoe ba' neutapa.
 Hata oereueng dja' meuranto,
 tréb han hiro roemoh tangga.
 Aneu' peuroemoh trôn lé meutjho,
 ba' Teungkoe Po djimeunada.
 Reudjang lé trôih woë di ranto,
 le djiboebo ngon areuta.
 Keunan djitrôn doem meutjo-tjo,
 njang doe' hiro djeuet keu kaja.
 Makanan le that djeueb-djeueb oeroë,
 hana soenjoë sabé gob ba.
 Njang doe' sinan njan bandoem troë,
 doempeue bagoë makanan na.
 Di sinan djitjo' batèe ngon tanoh,
 poewoë oe roemoh keu peunawa.

Djroh ngon sangka njan djisatoh,
 toehan poepeunoh ban djipinta.
 Oereueng nanggroë njan jakindji that,
 keunan meuhadjat ba' Èelia.
 Sinan djidom ngon gèt kasat,
 teuseubèh le that ngon beuet doe'a.
 Oereueng moepaké njang moekhalapah,
 trôn meusoempah keunan sigrā.
 Reudjang sinan moseutadjabah,
 njang soelèt sah reudjang njata.
 Teuka sakét tjeuko' piro',
 ladōm meudo'-do' teusrō' sigrā.
 Di sinan lé djih meutoempō',
 leumoh leumpō' djeueb angèeta.
 Ngon sabab njan djeuet teumakōt,
 han lé karōt poeboeet mongka.
 Njang siteungoh oentōt boerōt,
 mata seupōt le njang boeta.
 Toehan bri keuramat oereueng njang salèh,
 neupeuleubèh njang takoewa.
 Salang aneu'miet meutarōh boh krèh,
 djimeutjoekèh djimeuda'wa.
 Meunoë djikheun „Kah ba' boedō',
 keuramat Teungkoe Lō' tjit karasa."
 Meunoë djikheun „Bè' hé abang,
 koemoewajang koetji gata.

Di gata pi na boeetteu irang,
 tapoelang boh goendoe hamba.
 Hana gala' lōn meusagang,
 han lōn meutjang boeet bé seuma."
 Meunan djikheun lé aneu'miet,
 „Bè' toepieb soempah di gata.
 Dalam até ba' gèt taniet,
 bè' latjieb narit njan taba."
 Toë ngon teumpat meunasah reuloih,
 njang ka gadoh hilé ie ba.
 Sinan le dali ba' kajèe timoh,
 lampōih ka meuroh le peunoela.
 Peunoelageu doem tan soë satoh,
 njang ka timoh hōm soë poela.
 Meuhat ba' njan doedoë timoh,
 meunan njang meu'oh tilé' sangka.
 Lam piké lōn kon boeet Toeān,
 Teungkoe Toeān njan ka tréb masa.
 Ka lawét that han soë toeban,
 salèh padjan tan hat hingga.
 Ka lawi masa ba' djameun phōn,
 Reutōih ribèe thōn njeum salèh na.
 Tanda kajèe njoë goh ribèe thōn,
 njeum oelōn doedoë gob poela.
 Salèh soë-soë keunan djitrōn,
 poega keubōn Teungkoe Tapa.

Masa Teungkoe ka plōh ribèe thōn,
 jōh awaj phōn prang ngon naga.
 Ba' pawōh njang na goh ribèe thōn,
 piké lōn doedoë gob poela.
 Djareueng ba' kajèe oedéb ribèe thōn,
 lam limong reutōih thōn njan ka boengka.
 Masa prang naga tan soë toekri,
 lheueh Diwadjadi angèn poeba.
 Masa njan phōn Soematra djadi,
 joeb tapa' gaki Sidjadi diwa.
 Phōn timoh naleueng seumiséb,
 ho makén tréb raja dōnja.
 Keu oebat ta'eun njan djipeudjéb,
 ngon koenjèt oedéb djipéh doea.
 Di blah Atjèh djikheun toepah,
 raja leupaih silagoëna.
 Ba' bé keupō' dheuen meudjamprah,
 hireuen dasah pandang mata.
 Bohdji mamèh ban ie madhoe,
 ba'dji soeloe manjang raja.
 Ta'eu di djeu'ōh siga' lakoe,
 na ban hantoe Djoegitapa.
 Mantong lam lampōih na siplōh ba',
 doem rampa' rindang lagoëna.
 Tjabeueng meudeunè òn doem meusa',
 meusiga' takalon roepa.

Sang teumakôt joeb njan tadjâ',
 sroej tangkoera' boelèe roema.
 Sabab hibat djikalon ba',
 Djén gala' sinan meudōda.
 Oereueng lam nanggroë teumakôt that,
 Tapa' Keuramat that meulia.
 Ramè sabé peulheueh hadjat,
 malam Djeumeu'at ratéb mènsa.
 Di oelèe tapa' siba' kajèe glé,
 manjang kon lé ba' that raja.
 Ōndji hidjō tjahja moeblé,
 lajèe maté tan ta'eu na.
 Boh njan djipadjōh lé tjéndajoe,
 ba' leuboe manjang lagoëna.
 Djipōt angèn soe meu'oe-'oe,
 até rindoe soë njang teuka.
 Ba' kajèe njan doea tjabeueng,
 gèt that teupheueng sabé raja.
 Sang takalon ban oereueng pheueng,
 prèh djilinteueng moesōh teuka.
 Tjōng ba' njan le that peureuléng,
 Itam ban kléng mirah mata.
 'Oh ka seupōt soe moebréng-bréng,
 é' biséng tango soeara.
 Na sidroë oereueng awa' sinan,
 niet tawan peureuléng pandjoë.

Mita geutah djitheun tjōng njan,
 meugapiet badan sinan paloë.
 Djikli' sinan 'oh meu'ōng-ōng,
 lakèe toelōng joe peulheueh droë.
 Hana sidroë é' djeuet oe tjōng,
 djitakōt meulambōng srōt oe boemoë.
 'Oh ka maté djih di sinan,
 doedoë teuma njan srōt oe dōnja,
 Peureuléng teukeudjōt masa njan,
 han tatoeban srob lagoëna.
 Ateueh djeurat han djeuet lajang droë,
 srōt lé oe boemoë lapè doemna.
 Leumoh sajeueb djih teupipoë,
 moepaloë maté lé landja.
 Doemnan keuramat koeboe tapa',
 teukeupa' binatang rimba.
 Teumakōt oereueng gadoh eumpa',
 ateueh njan djidja' pantang raja.
 Meugah haba njan keudéh keunoë,
 oereueng nanggroë takōt doemna.
 Ateueh djeurat tan djeuet peutoë,
 lingka pageue njoë djidoeë' rata.
 Kajém na sinan rimoeeng itam,
 'oh ka malam gob eu roepa.
 Neuraja ban keubeue moendam,
 rimoeeng agam djaga-djaga.

Gaki likōt blah wie lapè,
 hana meunè keunan teuka.
 Leumah ta'eu wa'tèe djisè,
 siblah lapè djihoee hila.
 Malam djeumeu'at kajém gob eu,
 sinan ba' koeboe éh teuhanta.
 Rimoeeng koembang nan gob oeroe,
 sabab lakoe itam soekla.
 Djih njan seu'iet gob tan djikab,
 ada' tapeurab djiwèh sigra.
 Keubeue leumo han tom djipeurab,
 ba' that ba' rab han moemara.
 Djimeuhej nan „Nè' toe di Lhō',
 bè' neuthō' kamoë dja' keunoë.
 Hadjat nada njang keunoë tō',
 nè' toe Datō' soerōt sigra.”
 Njankeu rimoeeng njang kawaj Lhō',
 la'én bè' tō' keunan teuka.
 Sangkira na rimoeeng la'én tō',
 soedji meuglō' djibri tanda.
 Na gob toepeue djih djamèe tō',
 oereueng Lhō' bè' dja' oe loea.
 Meunan lageuem doem leungo tō',
 doem di Lhō' teubiet doem hana.
 Sangkira lam peukan arè tan sabé,
 sit teuka lé rimoeeng raja.

Habéh djipoh sigala bé,
 binatang tarabé habéh pahna.
 Tan djipadjöh binatang maté,
 djitie' bangké ban sinaroë.
 Meunan sabé pi'é Si Koembang,
 han djeuet irang arè katoë.
 Di Tapa' Toeän ka meuteuntèe,
 tröih ba' wa'tèe toela' bala.
 Peus'djoeë' Lhō' geuhej djamèe,
 doemna soekèe ban sineuna.
 Ba' boeleuen Sapa raja kanoeri,
 geuhej Pakhi ngon 'oelama.
 Raboe Habéh keunan doem ili,
 trön oe pasi agam dara.
 Tjoet ngon raja meungoej tari,
 doem ili lam sampan raja.
 Djidja' manoë bandoem sari,
 boih malang di djeueb angèeta.
 Ba' djeurat tapa' djipeudong seueng,
 peugléh naleueng oeteuen njang na.
 Habéh djitjah doem djitinteueng,
 Seuma' oeseueng peungeuih rata.
 Leumo ngon keubeue dj'sie leugat,
 djamèe le that doem tröih landja.
 Geubeuet Moekadam Koeroe'an tamat,
 niet doem boelat toela' bala.

Sinan djipeudong Poepandji 'Alam,
 manjang lanam silagoëna.
 Soë njang kalon até deundam,
 sangka waham ma'moe banda.
 Djibõh keu alam poepandji poetéh,
 tanda gléh até lam dada.
 Leumah dji'eu goenong blahdéh,
 wareuna khaléh poetéh sapha.
 Poepandji toeha djipoemoeléh,
 djitrie' habéh bagi rata.
 Gantoë adjeumat sakét peudéh,
 reudjang poeléh ba' meurana.
 Ba' aweue' djaroe ladõm dji'ikat,
 njang le that ba' takoe rata.
 Ladõm dji'ikat na ban ikaj,
 ba' boh sapaj ladõm pi na.
 Meunankeu haj oereueng barat,
 ka teu'adat niba' Madja.
 That gala' dja' ba' keuramat,
 peue djiminat keunan nada.
 Keu rimoeeng koembang djibri bahgi,
 paweue proeet sari keunan djeumba.
 Djampoe asoë oerat ngon gaki,
 raseuki ba' toela' bala.
 Oebé ban haba meunan keunarang,
 tan meu'irang ban tjalitra.

Bè' peusalah njang keumarang,
 keu haj prang Teungkoe ngon naga.
 Le njang toepeue oeiba' bhaih njan,
 leubèh niba' njan na lom haba.
 Di Balè Poestaka njang peugah ban,
 „Akhé bangkaran Si Goentala.
 Koeboe Toeàn tan soë toepat,
 sinan meuhat tapa'neu na.
 Lhèe pat tapa' meuseuhoe that,
 oereueng meuhadjat hana reuda.
 Saboh tapa' di Intém-intém,
 doea teuseulém Gajo raja.
 Di goenong Apoej sinan polém,
 le ladém keunan meunada.
 Njang keulhèe di Lhō' Tapa' Toeàn,
 peunanjang saban siplōh deupa.
 Toeàn njan raja han treu paban,
 lam awan meutob koepala.
 Adat meung kon raja that badan,
 han é' lawan Si Goentala.
 Dja' eu roepa njan pakri ban,
 Lhō' Bajōh njan Poelo Naga.
 Njan bé raja naga panjang,
 la'ot Padang dja' peunjata.
 Salèh ho neuorōb 'oh ltheueh moeprang,
 kadang djeumeurang manggroë raja.

Na tjit peuneugah oereueng meu'awé,
sisat lam glé saboh masa.

Ba' masa njan oeteuen doem saré,
hana é' lé rèt djimita.

Ba' Tapa' Toean keunan teubadé,
Meudom saré ban sineuna.

Si meudama ngon meu'awé,
éh lé saré hè' lagoëna.

Dji'eu sinan ngon meunasah,
koelam indah gèt moebanda.

Djimita oereueng hana leumah,
djihej 'oh draih djaweueb tan na.

Di sinan djitoeeng ie seumajang,
doe' bimbang sinan meudoe'a.

Ba' teumpat njan atédji seunang,
djiseumajang poedjoë Asa.

Doea lhèe malam djidom sinan,
doedoë niba' njan landja gisa.

Beudoih bandoem seu'õn boeban,
dja' si'oeroë njan keunan teuma.

Han é' meuteumèe ngon rèt djiwoë,
éh lom doem droë lakèe doe'a.

Ba' malam njan djimeuloempoë,
dji'eu sidroë oereueng raja.

Badan raja that panjang lampoë,
djanggõt tanggoë trõih oebe' pha.

Neupeugah droë njan neukheun proë,
 „Kèe po nanggroë ban sineuna.
 Kèe njoë Teungkoe Tapa' Toeana,
 ba' katoeban lé kah doemna.
 Singoh beungoh djeuet kawoë njan,
 sisatkeu han trōih oe tangga.
 Ban soeboh teukeudjōt reudjang,
 djiseumajang ngon beuet doe'a.
 Lheueh di sinan djiseumajang,
 dji'eu ka trang peungeuih dōnja.
 Ba' kroet mamèh di leuen siba',
 ba' that rampa' boh meugisa.
 Dji'eu boh kroet hireuen gala',
 boh doem masa' le lagoëna.
 Bohdji sarat na lhèe bagoë,
 'adjajéb han soë dalam dada.
 Boh koejoeen ngon boh kroet manoë,
 lhèe bagoë dji'eu wareuna.
 Teuma djipèt boh kroet mamèh,
 rasadji mamèh niba' saka.
 Ban lhèe peue bèe that meusrèh-srèh,
 that leubèh hirōm lagoëna.
 'Adjébdji that keu boh kajée njan,
 lam siba' njan lhèe ban roepa.
 Ban djikalon boh meunan ban,
 jo badan teumakōt raja.

Djitoepeue di sinan na keuramat,
 that himat narit djiboeka.
 „Ngon keuramat Teungkoe po teumpat,
 kamoë njang sisat trōih oe tangga.”
 Kroet Wareuna njan djimeunan,
 beuneuri Toehan keu Êelia.
 Lam Sjoeroega neupeutrōn keunan,
 tanda njan Keuramat Raja.
 Lheueh niba' njan oereueng njan beudoih,
 woë oe roemoh rèt djimita.
 Han tréb sinan ba' djibeudoih,
 ka leumah djroh rèt biasa.
 Ba' djidja' njan badan koeat,
 ngon si'at ka trōih oe nanggroë.
 'Oh trōih meuteumèe rakan sahbat,
 djipeugah „Sisat bandoem kamoë.
 Teuma meuteumèe teumpat keuramat,
 doe' 'ibadat lhèe peuet oeroë.
 Di sinan meu'eu doem 'adjajéb that,
 djroh that teumpat hireuen laloë.
 Siba' ba' kroet lhèe ban roepa boh,
 sinan timoh ba' Êelia.
 Djeueb-djeueb tjabeueng meunan timoh,
 lhèe roepa boh Kroet wareuna.
 Djeunoë han lé ta'eu sinan,
 salèh Toehan poewoë teuma.

Lam sjoeroega teumpat aman,
 njeum lôn meunan meung bit beuna.
 Lom niba' njan oelôn loempoë,
 leumah sidroë oereueng raja.
 Tan meutoe'oh njan peugah proë,
 raja lampoë tan meuhingga.
 Geukheun droë oereueng po nanggroë,
 ba' teumpat njoë asaj moela.
 Teumakôt kamoë hana bagoë,
 landja moewoë ban sineuna.
 Sang ka maté lôn lam loempoë,
 njeum dônja njoë ka binasa.
 Meunan leumah njang meu'eu proë,
 raja that droë tan ngon peusa.
 Geukheun „Kèe Teungkoe Tapa' Toeana,
 beu katoeban lé kah njang na.
 Sabé sinoë djeu'ôhkoe **tan**,
 koeprèh djan kiamat dônja.
 Wa'tèe di sinoë leumah poepandji,
 tanda dali na moemara.
 Ba' reudjang njan takanoeri,
 na Toehan bri djeu'ôh bala.”
 'Oh lheuë habéh haba djipeugah,
 meuseuhoerah sagaj dônja.
 Meunan oereueng njang poemeugah,
 kon beurakah ngon preuboela.

Koeboe Toe'an kon di sinan,
 tan soë toeban ban sineuna.
 Njang na é' thèe sidroë Toehan,
 la'én tan 'èleumèe hana.
 Meunan asaj Tapa' Toe'an,
 njang gob kheun ban peugah haba.
 Di sinan Goenong Meungawan,
 ladôm peunan Goenong Toe'an na.
 Neudoeë' sinan hana rakan,
 poedjoë Toehan lam wareu'a.
 Djeuet keuramat ba' teumpat njan,
 tan ingat Toe'an njan keu dônja.
 Le that boënah tanda Toe'an,
 jôh goh keunan trôih Beulanda.
 Djeunoë tanda le that ka tan,
 tan soë toeban peue keureuna.
 Dali njang na goh lom hantjô,
 jôh meuhoebô prang ngon naga.
 Boënah ba' naga njan mantong le,
 darah meusimbô masa loeka.
 Di ateueh batèe rô meuhambô,
 teupoerô meuleu'a-leu'a.
 Tan meucebah sang ban barô,
 batèe meulô-lô mirah doemna.
 Lom dali ba' batèe itam,
 até naga lham ba' djikeupa.

Sabab meuseupot ba' djidram-dram,
 djeuet keu itam batèe njang na.
 Gob peunan njan Batèe Itam,
 djroh leugam poelam Banggala.
 Tanoh Batèe mirah leugam,
 boeet Toehan dali neubri na.
 Na saboh aloee raja han ban,
 njan djimeunan Aloee Naga.
 Meung njo tabandéng loeah aloee njan,
 naga agam njan boekét raja.
 Djeunoë la'én haba lôn sambat,
 naga raja that njang ka loeka.
 Nietdji njan djidja' meu'oebat,
 oe barat Lhō' Bajōh landja.
 Ama ba'adoe njoë njang akhé,
 kisah han lé tamat haba.
 Naga agam djigoelé-goelé,
 djimoë sabé hana reuda.
 Di sinan beudoih djipeudja',
 di Poelo Banja' la'ōt raja.
 Djilangoe ladjoe djitindja',
 goeloembang meuta' that tjéntjala.
 Harō' laōt tan seunabé,
 oebé-bé glé alōn raja.
 Dji'oeloe badan sambé-sambé,
 „Salèh maté aneu' ngon ma.

Kapaj raja na oebé glé,
 djipawang lé Kandjamara."
 Meunan waham njang djipiké,
 „Salèh han lé koe'eu mata."
 Naga agam sabé djimoë,
 dji'ingat binoë ngon aneu'nda.
 Salèh pakri akhé doedoë,
 Laba roegoë tō' thèe hana.
 Lom dji'ingat keu oentōng droë,
 meuteutaloë rō ie mata.
 „Salèh tan loerōng ba' siseun njoë,
 ba' go njoë oelōn binasa."
 Meunan djikheun sara djimoë,
 djipiké droë tiwaih grada.
 Le teu'ingat moeboebagoë,
 keu aneu' droë leupaih gob ba.
 Djibeudoih sinan djidjeumeurang,
 keudéh oe Padang peukeue landja.
 Tan teudōh sabé djingeurang,
 soe meudrang-drang oe adara.
 Lam la'ōt sabé dji'arōih,
 oe Lhō' Bajōh trōih djihala.
 Di sinan djikeumeung piōh,
 hana é' rōh ban djipinta.
 Keumeung peu'oebat loeka asoë,
 meuteumèe droë Si Phéthaba.

Goentala djeuet lé Poelo Meutaloë,
 ban roepa droë oebah hana.
 Di Lhō' Bajōh binèh nanggroë,
 meunan roepa droë di Goentala.
 'Ohnoë habéh hikajat njoë,
 la'én ba' kamoë tō' thèe hana.
 Ada' khileueh meu'aih doem droë,
 niba' sinaroë njang beuet haba.
 Bahkeu 'ohnoë oelōn karang,
 keu haj prang Teungkoe ngon naga.
 Soë njang bidja' tamah peutrang,
 lōn djoelang ateueh djeumala.
 Poelo Naga di Lhō' Padang,
 sinan pantang that bit raja.
 Doemna Sa'ti njang djeumeurang,
 habéh djitjang lé Goentala.
 Ba' that sihé bie' hoebatan,
 'oh trōih keunan toempōj doemna.
 Meung meurimbaih ba' poelo njan,
 keunong nan malapeutaka.
 Sinankeu phōn teuka malang,
 han lé meunang peue tasangga.
 Meuhat sinan gata gob tjang,
 bè' meusoegang gèt tasaba.

TAMAT HABA.

